

宋文鑑卷第六十五

表

謝衣襖表

宋祁

謝換龍閣表

宋祁

謝加端明表

宋祁

代陳州章相公乞致仕第一表

宋祁

乞致仕表

張方平

服闋謝復官表

孫沔

揚州謝上表

劉敞

謝加學士表

劉敞

賀皇長子封公表

王拱辰

永興謝上表

司馬光

進資治通鑑表

司馬光

蘄州謝上表

呂誨

乞致仕表

呂誨

潭州通判謝上表

唐介

賀冊皇妃表

王安石

賀生皇子表四首

王安石

漳州進珠表

王冕

謝衣襖表

宋祁

冬簪乘辰裘官著令疾馳使駟臨撫塞屯並頒齊筭之良均挾吳
縣之煖被躬且吉束帶有華伏惟尊號皇帝陛下至德誕敷深
仁普愛念官師所以卒歲恐天下有受其寒據泰軫窮當舒慮慘
況淒其戒序必惻然動心特以濱塞沍嚴持兵轍露句傳溫詔緘
褚紋袍爛然晝鮮煦若春至矧部校什長賜各有差僻壘窮郭悅
而忘苦振裾交扑聯襪相趨和氣暢肢顧折膠而何畏大恩壓已
憂稱服以爲難有可仰酬不知輕殞

謝換龍閣表

宋祁

停直複門徙恩層閣本緣親而自乞蒙引籍以對除揆寵兼常無
顏容愧竊惟先聖有作叢構實與鬱律辰居之嚴篋積霧圖之廣
踵華創職稱是取材肇允榮塗何嘗輕授伏念臣識局庸淺術學
膚孱入參玉堂閒陪講殿徒以朴忠無飾孤耿自將附湜湜於涇
清守嚶嚶於雨晦賴天燾照曠日保全適以臣兄庠召自外藩復
參大政理所宜避地不處嫌稽首請閒素言敘懇丐上還於禁籍
得專侍於經帷伏蒙 尊號皇帝陛下見謂由衷特從換秩罷茲
要近處以清閒拂此礙之塵容廕蠶蛸之寶宇伏況臣出入三歲
便蕃五遷四叨學士之名罕見從官之比雖素領焦禿病幹庭癯
器極斗筭之容利止鉛刀之割尙當勉懦爲立續短裨長儻有補
於涓銖矢不忘於隕跼

謝加端明表

宋 祁

乘蹇無狀增秩蒙褒賜予侑頒心顏交靳伏念臣才弗振俗士偶
逢時備內朝臣十有六載學不足膺天子之問文無以代王者之

言遂圖外遷冀云少補惟定武一道契丹右廷咸平以來號勁兵處自夏竦分建四帥韓琦始領九州節制中軍部分諸將琦旣進律臣實代居以一介懦儒當萬夫要任誼難辭劇奮靡顧愚然臣所習者藝文未曉者軍旅用非所習雖勤而弗效責於未曉故技有必窮用是再葺居無底績在法云殿惟黜是宜敢謂尊號皇帝陛下憫久戍之勞排彼譖之侈雖遠猶錄謂拙可矜收雲閣之故資著丹殿之新籍仍秩經省未易守藩叢沓徽章夸嫖鄙邑重降嚴旨切卻讓封臣亦內揆愚心旁諗公議若循禮疊請則恐涉不誠或固節還恩又似規早罷不有寵使誰扞邊疆例格除音孰尊寵數輒昧涯分祇服器名日三省以自營身九殞而奚報但臣所念者邊務至重虜詐益滋得人失人繫守臣輕重知已知彼爲天下安危而有司特用苛法相延守臣類以生事爲解封候畏怯不敢搖手倉庫虛乏正可寒心建明累上而朝省未從姑息小虧則謗囂立至況臣衰晏素自憊冥判無成功徒忝休命望審擇於

豪俊俾臨統於方隅設張遠謀羈制驕狄因罄敷於感臆竊附列
於瞽言朔壘地卑君門天阻被符蠲謁攬綬知榮

代陳州章相公乞致仕第一表

宋 祁

臣聞器有所極強之者必顛志有所安違之者將敗是故智士不
窮量以邀受仁君無拂願以責功內顧危惊敢援茲喻伏念臣姿
力駑下術略迂疎蒙幸中人之材待罪宰相之府寵與時進負隨
日深謀謨弗良彫紊相踵羗夏有未纓之醜關陝多無聊之人萑
盜跳梁篁酋煽結杼軸罄於編戶杆皮蠹於遠方上貽焦勞外謹
謗誚咎不臣執罪將孰歸比者荐瀝肝膺願乞骸骨冀蒙不職之
竄以贖安用之辜 尊號皇帝陛下包納荒遐親喻戒勅須訖郊
丘之享乃許印綬之還褻亮所加諄慈兼至臣此時外迫大誼中
忘至愚敢優游以自安輒皇恐而視事然而智慮淺局年鬢頽侵
短臂屈長袖之前疲足困新羈之左覲然尸位倏又彌年所賴
陛下以百姓爲心天下爲度捨末爭而納戎帳之欸捐滯積以撫

遼社之和克展上儀遂布鴻慶永惟橫目之庶方就覆孟之安臣
之及茲可謂天幸過此不止其如罪何雖大度之見容在輿議之
難遏抑又聞當退而進者悔必及宜黜而用者傷必多高位乃身
殃之媒厚祿爲眾怨之舍借令臣冒厥明戒苟留上司玷廊廟之
儀形被史家之貶戮死有餘咎仁弗忍爲伏望察如丹之誠憐指
景之暮遂容納政早獲省私亦不必窮喋喋之言乃垂開可惜齟
齬之謹妨用俊良虔冀曰俞誓無但已

乞致仕表

張方平

竊以大君保息之慈人之老者疾者得所養治國經常之制仕之
進者退者惟其宜不堪陳力之勞爰上乞骸之請詔函下降天旨
未俞臣聞委質大方前經明訓自古不得謝者在禮雖或有之然
皆德業高賢功勳夙望邦家倚以爲重中外賴之爲安加恩所以
特優被寵誠爲無愧是以義全大體眾罔聞言如臣徒以空疎早
蒙簡擢事猷弗建報稱蔑施遽及衰疲遂求引罷而更濫當渥命

遙領眞祠位陪執政之班祿倍大夫之秩職憂靡預官責不加上
素彝章俯慙私倖敢循舊典謹復自陳伏惟 皇帝陛下一氣均
私大圓丕冒匹夫白盡各伸所志之微萬物由庚皆受曲成之賜
俯諒虔勤之懇特垂開可之恩精驚紫宸猶結望雲之戀迹還白
社終懷樂聖之心

服闋謝復官表

孫沔

苴麻之服方爾外除綸綍之言驟然下及矧不移於舊序仍獲處
於近聯拜賜之深竊寵爲甚伏念臣出自單緒偶階盛時無近强
之依以進身惟清素之業以自立遽由宸眷升漸禁塗固常入備
諫員出分使委雖明目張膽內屢輸於忠言而竭力勉心外未揚
於民最旋以邊烽小警王師有爲朝廷擢以常僚假以煩使兵儲
之寄固已屢更邊帥之權亦嘗冒處厯踐數任甫逾七年轉漕非
能偶芻粟之充給招懷寡術幸部落之妥安以慈親之耄期益精
力之衰耗力陳愚素仰瀆宸聰懇辭益部之行適遂奏都之請故

雖嘗拜命曾未莅曹果家難之纏哀奉靈輿而歸葬偶全餘息以畢通喪生意蔑然榮望已矣此蓋伏遇 皇帝陛下恢天地容蓋之德廣日月照臨之明以犬馬之勞曾屢膺於驅策而涓埃之益嘗有補於高深降中旨以召還俾參華於舊貫復援小銓之秩再躋延閣之榮敢不謹修吏方勤瘁王事昔焉爲養尙當避危而就安今也卽孤自可以身而許國誓圖大效庶答鴻休

揚州謝上表

劉敞

一介之材善無所取千里之地任爲不輕仰載恩華退增慙懼臣聞事上之行莫若愛君而愛君之臣莫重去國汲黯遺言李息望之致意本朝古今美談賢哲餘事況臣本以薄技遭茲昌辰幸得出入周衛之中優游侍從之末持橐簪筆庶乎寡尤帶劔佩衡足以自効豈其輕去嚴密之奉偷得便安之私蓋引嫌避親中外著令因事補吏朝廷通規幸蒙賜可之書殆殊其治之選伏遇 皇帝陛下天度容物聖資盡人揆其忠誠非有違象魏之意察其淺

識猶足寄民社之安沛然德音委以符竹敢不勤恤人隱奉宣上
恩自飾固陋之心庶幾樂易之政

謝加學士表

劉 敞

常人之情得所求而喜智者之慮過其任而憂今邊備雖嚴帥責
差易學者雖眾儒選實難豈有貪就應聲之求忽忘非分之任怔
忪失據欣懼兼懷固欲辭榮未獲承命伏念臣猥以薄技起於諸
生內之無子產潤色之才外之無山甫將明之用久典訓誥荐臨
藩垣七年于茲微效不立猶以陪外廷之末聞長者之風閒蒙分
章平議臣之奏時引大體正宗廟之儀苟圖納忠非敢迂物然而
讒人飾詞以巧詆法吏挾怨以中傷當是之時幾無以免聖心先
覺公議尙存浸潤之說不行震驚之眾爲止風波可畏天幸實多
內私自憐懼久得罪輒勾千里之守庶警一麾之行不謂 尊號
皇帝陛下生成曲全覆露無已進預金華之講增重儒林之光委
以西州適其素願望非所及幸不可涯夫匹夫一飯之恩庸士然

諾之信猶能捐生出死成功立名況臣連數十城之封兼四千石之重於以宣明威信撫養細民盡其愚忠庶免大悔以此圖報敢爲虛言

賀皇長子封公表

王拱辰

建親授社屏翰於王家封子維城安疆於國幹誕揚休命敷告羣倫均海寓之歡心洽朝廷之大慶竊以宗藩錫瑞賢戚分疆周列侯邦半諸姬而啟土漢有天下非劉氏則不王皆所以滋大本枝維持京室縣鼎數於穹壤固廟祏於山河屬我熙朝益隆茂典恭惟皇帝陛下纂承皇序恢闡洪圖善迪孫謀適遵祖構乃眷元良之重已昭岐嶷之英肇啟南圻崇加上袞離明震豫知帝緒之無疆海潤星暉戴吾君之有子臣居留近甸迹遠縣堠側聽恩章舉增抃懌

永興謝上表

司馬光

荷恩至重任責尤深巡撫吏民敷宣詔令臣識慮闇淺規爲闕疎

唯知愚忠屢貢狂直奉事三世操守一心閒以齒髮浸衰疾疹交集會靡論思之効久污侍從之班既無補於本朝祈自高於散地不圖睿澤更委名都雖要重之權自知不稱而煩劇之地難以固辭受命以還措躬無所竭來就道甫爾到官維此咸秦昔爲畿甸山川清美土地膏腴論其平時誠爲樂土在於今日適值凶年經夏亢陽苗青乾而不秀涉秋淫雨穗黑腐而無收廩食一空家乏蓋藏之粟襁負相屬道有流離之人老弱懷溝壑之憂姦猾蓄萑蒲之志正宜安靜不可動搖譬諸烹魚勿煩擾則免糜爛如彼種木任生殖則自然蕃滋謹當策勵疲鷃彫磨朽鈍智力所及勤瘁無辭雖復失位危身終不病民負國庶幾小補用答大恩

進資治通鑑表

司馬光

先奉勅編集歷代君臣事迹又奉聖旨賜名資治通鑑今已了畢者伏念臣性識愚魯學術荒疎凡百事爲皆出天下獨於前史粗嘗盡心自幼至老嗜之不厭每患遷固以來文字繁多自布衣之

士讀之不徧況於人主曰有萬機何暇周覽臣嘗不自揆欲刪削冗長舉撮機要取關國家興衰繫生民休戚善可爲法惡可爲戒者爲編年一書使先後有倫精粗不雜私家力薄無由可成伏遇英宗皇帝資睿智之性敷文明之治思歷覽古事用恢張大猷爰詔下臣俾之編集臣夙昔所願一朝獲伸踊躍奉承惟懼不稱先帝仍命自選辟官屬於崇文院置局許借龍圖天章閣三館閣書祕籍賜以御府筆墨繪帛及御前錢以供果餌以內臣爲承受眷遇之榮近臣莫及不幸書未進御先帝違弃羣臣陛下紹膺大統欽承先志寵以冠序錫之嘉名每開經筵常令進讀臣雖頑愚荷兩朝知待如此其厚隕身喪元未足報塞苟智力所及豈敢有違會差知永興軍以衰疾不任治劇乞就冗官陛下俯從所欲曲賜容養差判西京留司御史臺及提舉嵩山崇福宮前後六任乃聽以書局自隨給之祿秩不責職業臣旣無他事得以研精極慮窮竭所有日力不足繼之以夜徧閱舊史旁採小說

簡牘盈積浩如煙海抉擿幽隱校計毫釐上起戰國下終五代凡
一千三百六十二年修成二百九十四卷又略舉事目年經國緯
以備檢尋爲目錄三十卷又參考羣書評其同異俾歸一塗爲考
異三十卷合三百五十四卷自治平開局迄今始成歲月淹久其
閒抵牾不敢自保罪負之重固無所逃重念臣違離闕庭十有五
年雖身處于外區區之心朝夕寤寐何嘗不在陛下左右顧以
驚蹇無施而可是以專事鉛槧用酬大恩庶竭涓塵少裨海岳臣
今筋骸癱瘁目視昏近齒牙無幾神識衰耗目前所爲旋踵遺忘
臣之精力盡於此書伏望陛下寬其妄作之誅察其願忠之意
以清閒之燕時賜省覽監前世之興衰考當今之得失嘉善矜惡
取是捨非足以懋稽古之盛德躋無前之至治俾四海羣生咸蒙
其福則臣雖委骨九泉志願永畢矣謹奉表陳進以聞

蘄州謝上表

呂誨

三諫則逃敢嚵大節一麾出守誠自寬恩舉族均榮畢身知愧伏

念臣戇冥所賦忠朴是存篤於愛君惟知盡道向議稱親之禮屢形繼統之言豈期佐佑之臣首違經義遂啟異同之論上感宸聰暨頒慈壽之手書仍用定陶之故事朋姦之眾蓋希宏博之要榮致主之謀不恥哀桓之亂制業雖已具理有未安臣忝備憲司正當言責既不能排斥邪佞將何以振肅紀綱心匪石以徒堅力迴天而莫得容身隳職公議何逃拒詔去官萬死寧贖而賴陛下至明委照全度兼容屬當求治之初務廣納忠之益言雖忤旨察其所嚮之誠罪不主名施以惟輕之典授符淮甸畫壤江壩魚稻之饒寔惟紆緩民社之重獲展勤勞天幸叢來國恩彌渥退思補過愈精夙夜之虔知無不爲更勵始終之節仰酬洪造誓竭顛愚

奏乞致仕表

呂誨

臣輒罄愚誠上千宸慈伏況微臣本無宿疾偶值醫者用術乖方殊不知脉候有虛實陰陽有逆順診察有標本治療有先後妄投湯藥率任情意差之指下禍延四肢寢成風痺遂難行步非祇憚

炎鑒之苦又將虞心腹之變勢已及此爲之奈何雖然一身之微固未足卹其如九族之託良以爲憂是思逃祿以偷生不俟引年而還政顧惟素志幾負明時力旣不足誠豈得已況恃睿監夙謀孤忠進非左右之容退知榮辱之分與之全節示以曲成臣不避再煩天聽欲乞致仕仍不願改官早賜開可臣無任籲天懇激之至

潭州通判謝上表

唐介

始竄嶺南人皆謂之必死及遷湖外恩寔出於再生仍復前官俾關郡政仰叨成命增激微衷切念臣寒素立身孤直無援歷官再紀才貳郎曹入朝踰年幸兼風憲臣自以逢聖明之治當言責之司祇知忠義以事君不顧患禍之及已凡所上奏必盡至公流輩爲臣寒心姦邪見臣切齒臣本欲爲耳目於陛下勉副簡求不能效鷹犬於他人以希進用心雖無媿迹已甚孤屬權臣之擅朝肆已私而害政輒輸忠款冀補涓塵陛對之閒未能悉意天威之

下卒莫自明得罪一時竄身萬里流離遠道殆及暮年擯弃遐荒
分甘散秩豈謂 皇帝陛下存國大體察臣愚忠欲招諫者之言
免爲後來之誠三推皇澤特與一官以邕廣之寇攘擇湖湘之守
倅俾從征筦得佐郡符然臣粗識義方薄知臣節納忠獲罪顧百
謫以誠甘盡瘁報君雖九死而不悔謹當益勤官守以助軍興夙
夜以思冀免於敗事毫分有補少答於大恩

賀冊皇妃表

王安石

禋盛之禮發於宮闈驪康之聲播於寰海伏惟 陛下考古之憲
刑家以身乃資婦德之良俾貳坤儀之政蓋關雎之求淑女以無
險詖私謁之心雞鳴之得賢妃則有儆戒相成之道於以助治不
專爲恩臣生逢明時切觀盛事祝聖人之多子輒慕堯封思令德
以式歌豈慙周雅

賀生皇子表

王安石

嘉慶係傳歡欣總集臣厯觀古昔誕受福祥厥配天所以久長乃